

Te pure nei au e e taamu-papû-hia'tu outou i te Atua, e ia nana'ohia Ta'na mau parau mau mure ore i roto i to outou aau e a muri noa'tu. Te pure nei au e, i roto i to outou oraraa, e faaite outou i to outou faaroo ! I te i'oa o Iesu Mesia, amene. ■

TE MAU NOTA

1. Ia fanauhia te hoê aiû, e taamuhia e piti taura i ni'a i te taura pito e e tapuhia i roto i te area o taua na taamuraa e piti. Te hoê taamuraa o te hoê ia taamu papu. No roto mai te ta'o *haapa'oraa faaroo* i te mau aa Latino, *re* oia hoi « faahou â » aore râ « ho'i atu » e te ta'o *ligare*, oia hoi, « ia taamu » aore râ « ia pu'oi ». No reira, te taa nei ia tatou e te « taamu nei te haapa'oraa faaroo i te feia faaroo i te Atua ».
2. Exodo 20:3. Taa ê atu i te reira, ua parau te Fatu, « a tatarahapa, a fariu ê mai i to outou mau idolo; fariu ê mai... i to outou mau mea faufau ra » (Ezekiela 14:6).
3. Te Parau Haapiiraa e Te mau Parau Fafau 6:36.
4. Hi'o Spencer W. Kimball, *The Teachings of Spencer W. Kimball*, nene'iraa a Edward L. Kimball (1982), 391.
5. Hi'o Mosia 2:41; Te Parau Haapiiraa e Te mau Parau Fafau ; 82:10. E mea mau teie haapiiraa no te mau taata atoa, no te mea « e ere te Atua e haapao i te huru o te taata » (Te Ohipa 10:34; hi'o atoa Moroni 8:12).
6. Te Parau Haapiiraa e Te mau Parau Fafau 132:22.
7. Hi'o Levitiko 15:13.
8. 2 Timoteo 3:7.
9. 1 Nephi 19:23.
10. Isaia 5:20.
11. Te haapii nei te papa'iraa mo'a: « A haere mai na i te Fatu ra, i Tei Mo'a. E haamana'o outou e, ua titiaifaro to'na mau haerea. Inaha, ua pirihaio te e'a no te taata nei, area tei mua tia ia'na, e ua titiaifaro hoi, e te tiahi uputa ra, o Tei Mo'a ia i Iseraela nei ; e aore hoi oia i tarahu i te tavini i reira ra ; e aore hoi e e'a ê, maori râ, na taua uputa ra ; e ore oia e vare, no te mea, o te Fatu ra o te Atua to'na i'oa » (2 Nephi 9:41).
12. Thomas S. Monson, « Courage Counts », *Ensign*, Novema 1986, 41. I te tahi atu taime, ua horo'a te peresideni Monson i teie a'oraa faaurûhia « no te ora faahiahia maitai, e ti'a ia ia tatou ia faarahi i te aravihi i te faaruru atu i te fifi ma te itoito, i te maururu ore ma te oaoa, e te manûiraa ma te haehaa... E mau tamaroa e mau tamahine tatou na te hoê Atua ora, e ua hamanihia ho'i tatou ia au i to'na ra hoho'a... Eita e nehenehe ia tatou ia tape'a noa i teie iteraa ma te ore e ite i te hoê auraa hohonu apî no te puai e te mana, e tae noa'tu i te puai ia haapa'o i te mau faaueraa a te Atua, e mana ia pato'i atu i te mau faahemaraa a Satane » (« Yellow Canaries with Gray on Their Wings », *Ensign*, Tiurai 1973, 43).
13. « E tapea ia outou iho eiaha e rave noa'tu i te mea paieti ore ra » (Moroni 10:32). Eiaha ia rahi a'e to outou ri'ari'a i te taata nei i to outou mäta'u i te Atua (hi'o Te Parau Haapiiraa e Te Mau Parau Fafau 3:7 ; 59:5).



Na Elder Richard G. Scott

No te Püpü no te Tino Ahuru Ma Piti Aposetolo

« Ua horoa'tu na hoi au i te [hi'oraa] na outou »

Te hi'oraa rahi roa'e tei ora i te fenua nei, o to tatou ia Faaora, o Iesu Mesia... Te ani nei Oia ia tatou ia pee i To'na hi'oraa maitai roa.

A feruri ai au i ta'u hopoi'a no te faaite i te evanelia, ua haamana'o vau i te feia ta'u i here e to ratou faaûruraa tei tauturu ia'u ia imi i te arata'iraa a te ra'i no te tauturu i to'u haereraa i mua i te pae varua. I te mau taime faufaa o to'u oraraa, ua haamaitai te Metua i te Ao ra ia'u a tono mai ai oia i te hoê taata no te tauturu ia arata'i i ta'u mau ma'itiraa i te mea maitai. Ua haapa'o ratou i teie mau parau a te Faaora « ua horoa'tu na hoi au i te [hi'oraa] na outou, o ta'u i rave iho ia outou nei, ia na reira atoa hoi outou ».¹

I to'u apîraa, e ere to'u metua tane i te melo no te Ekalesia e e melo paruparu to'u metua vahine. Ua ora matou i Washington, D.C. e te ora ra te metua o to'u mama e hau atu i te 4 000 kilometa i rapae au i te tuhaa fenua no Washington. Tau mau ava'e i muri a'e i te va'uraa o to'u matahiti, ua haere mai o mama ruau Whittle e farerei ia matou. Ua haape'ape'a oia e, aita vau e to'u taea'e paari a'e i bapetizohia. Aita vau i ite eaha ta'na i parau i to'u na metua no te reira, ua ite râ vau e ua afa'i oia ia maua to'u taea'e i te auâ faafaearaa e ua faaite mai i to'na mau mana'o no ni'a i te faufaa

rahi ia bapetizohia e te haere-tamauraraa i te mau pureraa a te Ekalesia. Aita vau i haamana'o i te mau mea atoa ta'na i parau, ua putapû râ to'u aau i ta'na mau parau, e aita i maoro roa ua bapetizohia vau e to'u taea'e.

Ua tamau noa o mama ruau i te paturu ia maua. Te haaamana'o nei au e, i te mau taime ua anihia vau aore râ to'u taea'e ia horo'a i te hoê a'oraa i te pureraa, e niuniu ia maua ia'na no te tahi mau mana'o tauturu. I roto i na mahana i muri mai e tae mai ia te a'oraa papa'i-rima-hia e ana. I te tau i muri mai, ua horo'a noa mai oia i te hoê reni arata'iraa, e na maua ia e faananea'tu â ia riro mai ei a'oraa.

Ua faaohipa tano noa o mama ruau i te itoito e te tura no te tauturu i to maua metua tane ia ite i te faufaa rahi ia faahoro oia ia maua i ta maua mau pureraa. Ua tauturu maite oia ia maua ia ite i te hoê hiaairaa no te evanelia i roto i to maua oraraa.

Hau roa'tu i te faufaa, ua ite maua e, ua here o mama ruau ia maua e ua here oia i te evanelia. Ua riro oia ei hi'oraa faahiahia mau ! Auê to'u maururu rahi no te iteraa papû ta'na i faaite ia'u i to'u apî-roa-raa ! Na to'na

huru maitai i faataui i te tereraa o to'u nei oraraa i te maitai mure ore.

I muri mai, a fatata ai au i te faaoti i ta'u tau haapiiraa i te haapiiraa teitei, ua here au i te hoê tamahine nehenehe o Jeanene Watkins te i'oa. Ua mana'o vau e, ua haamata oia i te here atoa ia'u. I te hoê pô, a aparau ai maua no ni'a i te oraraa i mua, i roto i te aparauraa ua faahiti oia i te hoê parau o tei tau roa i to'u oraraa. Ua parau oia, « ia faaipoipo ana'e au, e faaipoipo ia vau i te hoê misionare tahito haapa'o maitai i roto i te hiero ».

Na mua'utu, aita vau i tau'a rahi i te parau no te hoê misioni. I taua pô râ, ua tau rahi roa to'u mana'o no ni'a i te taviniraa misionare. Ua ho'i au i te fare e aita i nehenehe ia'u ia feruri i te tahi atu ohipa. Ua ara noa vau i taua aru'i ra. Aita roa'utu vau i haapa'o noa'e i ta'u haapiiraa i te po'ipo'i a'e. I muri a'e i te mau pure e rave rahi, ua rave au i te faaotiraa ia farerei i to'u episekopo e ia haamata i te faa'i ta'u mau parau misioni.

Aita roa'e o Jeanene i ani ia'u ia tavini i te hoê misioni *no'na*. No to'na here ia'u i faaite ai oia ia'u i to'na mau mana'o papû e ua horo'a mai ia'u i te rave'a ia ma'iti i te e'a no to'u iho oraraa. Ua tavini maua e piti atoa ra i te misioni e i muri iho, ua taatihia maua i roto i te hiero. Na te itoito e te tape'a-mau-raa o Jeanene i to'na faaroo i faatupu i te tauraa i roto i to maua nei oraraa amui. Ahani aita to'na faaroo puai no ni'a i te haapiiraa ia tavini na mua roa i te Fatu, ua papû ia'u e, eita ia maua e ite i te oaoa ta maua i fana'o. Ua riro oia ei hi'oraa faahiahia e te parau-ti'a !

No to raua here ia'u i faaite mai ai o mama ruau e o Jeanene i to raua mana'o papû e, e haamaitai te mau oro'a no te evanelia e te taviniraa i te Metua i te Ao ra i to'u oraraa. Aita roa raua i faahopo aore râ i faaino i to'u huru. Ua here noa râ raua ia'u e i te Metua i te Ao ra. Ua ite raua toopiti e, o Oia o te nehenehe e faarahi atu â i to'u oraraa, e ere râ o vau iho. Ua tauturu itoito raua tata'itahi ia'u ma te here ia ite i te e'a o te oaoa rahi roa'e.

Nahea e nehenehe ai ia tatou ia riro ei faaûruraa maitai mai teie te huru ? E



ti'a ia tatou ia haapapû i to tatou here mau i te feia ta tatou e hinaaro nei e tauturu na roto i te parau-ti'a, ia nehenehe ia ratou ia haamata i te faananea i te ti'aturiraa i roto i te here o te Atua. No te mau taata e rave rahi i te ao nei, te taahiraa matamua no te farii i te evanelia, o te faananearaa ia i te faaroo i te hoê Metua i te Ao ra, tei here mau ia ratou. E mea ohie a'e ia faananea i taua faaroo ra mai te mea te vai ra te mau hoa aore râ te mau melo o te utuafare o tei here ia ratou mai teie te huru.

Na roto i te horo'araa ia ratou te ti'aturiraa i roto i to outou here, e nehenehe ai ta outou e tauturu ia ratou ia faananea i to ratou faaroo i roto i te here o te Atua. I muri iho, na roto i to outou here, na roto i te aparauraa, e haamaitaihia to ratou oraraa na roto i to outou faaiteraraa i te mau haapiiraa ta outou i haapii mai, te mau iteraa rau ta outou i farii, e te mau parau tumu ta outou i pee no te ite mai i te mau rave'a no to outou iho mau araraa. A faaite i to outou mana'ona'oraa mau i to ratou maitai ; i muri iho a faaite

i to outou iteraa papû no te evanelia a Iesu Mesia.

E nehenehe ta outou e tauturu atu na roto i te mau rave'a tei niuhia i ni'a i te parau tumu e te haapiiraa tumu. A faaitoito i te feia ta outou i here ia imi ia maramarama i te mea ta te Fatu e hinaaro ra ia ratou ia rave. Te hoê rave'a no te rave i teie o te uiraa ia ia ratou i te mau uiraa no te haaferuriraa ia ratou, i muri iho ia vaiiho ia ratou i te taime au—e mau hora anei, mau mahana anei, mau ava'e anei, aore râ hau atu â—no te feruri hohonu e no te imi i ta ratou iho mau pahonora. E ti'a ia outou ia tauturu ia ratou ia ite e nahea ia pure e nahea ia ite i te mau pahonora i ta ratou mau pure. A tauturu ia ratou ia ite e, ua riro te mau papa'iraa mo'a ei hoê puna hinaarohia no te fariiraa e te iteraa i te mau pahonora ra. Na roto i te reira, e tauturu atu ia outou ia ratou ia faaineine no te mau rave'a e te mau fifi e tupu mai a muri a'e.

Te opuaraa a te Atua, oia ho'i, « ia faatupu i te tahuti ore e te ora mure ore o te taata nei ».² E mea faufaa te



reira no te mau mea atoa ta tatou e rave nei. I te tahi mau taime te hahi ê nei tatou na roto i te mau mea ta tatou e mana'o nei e mea faahiahia aore râ, no te rahi roa o ta tatou mau hopoi'a i te tino nei e mo'e-roa-hia ia tatou te mau fâ a te Atua. Ia tamau râ outou i te faatumu i to outou oraraa i ni'a i te mau parau tumu rarahi, e noaa ia ia outou te hoê iteraa no te mea ta outou e ti'a ia rave, e rahi atu â outou i te horo'a i te hotu na te Fatu e te oaoa hau atu no outou iho.

Ia faatumu ana'e outou i to outou oraraa i ni'a i te mau parau tumu no te rave'a o te faaoraraa, e faatumu atoa'tu ia outou i ni'a i te faaiteraa i te mea ta outou i ite no te mea ua taa ia outou te faufaa mure ore o te mau oro'a o te evanelia. E faa'ite atoa'tu ia outou i te mea ta outou i ite na roto i te hoê rave'a o te faaitoito atu i to outou mau hoa ia hinaaro ia haapuaihia i te pae varua. E tauturu atoa'tu ia outou i te feia tei herehia e outou ia hinaaro i te haapa'o i te taatoaraa o Ta'na mau faauerua e ia rave i te i'oa o Iesu Mesia i ni'a iho ia ratou iho.

A haamana'o e, te faafariuraa o te mau taata, o te hoê noa ia tuhaa o te ohipa. A tutava noa i te haapuai i te mau utuafare. A haapii ma te hoê iteraa no te faufaa rahi no te mau utuafare ia taatihia i roto i te hiero. E titauhia paha e rave rahi matahiti no

te tahi mau utuafare, mai teie utuafare o to'u na metua. E rave rahi matahiti i muri a'e i to'u baptizo-raa-hia, ua baptizohia to'u metua tane, e i muri mai, ua taatihia to'u utuafare i roto i te hiero. Ua tavini to'u metua tane ei taata taati i roto i te hiero, e ua tavini atoa to'u metua vahine i piha'ihio ia'na i reira. Ia roaa ana'e ia outou te iteraa no te mau oro'a taatiraa o te hiero, ei reira outou e tauturu ai i te patu i te basileia o te Atua i ni'a i te fenua nei.

A haamana'o, te hereraa ia ratou, o te niu puai ia no te faaûruraa i te feia ta outou e hinaaro ia tauturu. E mea faufaa ore paha te faaûruraa maitai a to'u mama ruau Whittle e a ta'u vahine faaipoipo, Jeanene, ahani aita vau i ite

Sydney, Auteralia



na mua roa e, ua here raua ia'u e ua hinaaro raua ia farii au i te mea maitai roa'e i roto i te oraraa nei.

Ei apiti no taua here ra, a ti'aturi ia ratou. E au ra e mea fifi i te tahi mau taime i te ti'aturi ia ratou, a imi râ i te rave'a no te ti'aturi ia ratou. E nehe-nehe ta te mau tamarii a te Metua i te Ao ra e rave i te mau mea maere ia ite ana'e ratou e, te ti'aturihia ra ratou. Ua ma'iti te mau tamarii atoa a te Atua i te tahuti nei i te opuaraa a te Faaora. A ti'aturi e a horo'a ia ratou te rave'a, e na reira faahou â ratou.

A faaite i te mau parau tumu o te tauturu i te feia ta outou i here ia haere i mua i ni'a i te e'a o te ora mure ore. A haamana'o e tupu rahi tatou te reni na ni'a i te reni. Ua pee mai outou i taua faanahoraa ra na roto i to outou maramarama i te evanelia. A tamau i te faaite i te evanelia na roto i te mau rave'a *ohie*.

Ua riro to outou iho iteraa papû no te Taraehara a Iesu Mesia ei mauhaa puai. Te tahi atu mau mauhaa, o te pure ia, te Buka a Moromona e te tahi atu mau papa'iraa mo'a e to outou haapa'oraa i te mau oro'a no te autahu'araa. E faaohie teie mau mea atoa i te arata'iraa a te Varua, e mea faufaa rahi roa ho'i ia turu'i outou i ni'a i te reira.

No te riro ei mea aravihi e te rave-raa mai ta te Mesia i rave,³ a faatumu i ni'a i teie parau tumu no te evanelia :

Na te Taraehara a Iesu Mesia e faariro ia tatou mai to tatou Metua i te Ao ra, ia nehenehe hoi ia tatou ia ora amui e a muri noa'tu i roto i to tatou mau utuafare.

Aita'tu e haapiiraa tumu hau atu i te faufaa rahi no ta tatou ohipa maori râ te Taraehara a Iesu Mesia. A faaite i te mau taime tano atoa e titauhia i to outou iteraa papû no ni'a i te Faaora e no te mana no Ta'na tusia Taraehara. A faaohipa i te mau papa'iraa mo'a o te haapii nei no ni'a Ia'na e no te aha Oia i riro ai ei hoho'a maitai no te mau taata atoa i roto i te oraraa nei.⁴ Titauhia ia outou ia tuatapapa itoito maitai. Eiaha e faaapiapi ia outou i te mau mea faufaa ore oi ere ai outou i te haapii mai i te haapiiraa tumu e te mau haapiiraa a te Fatu. Ma te hoê niu papû o te haapiiraa, e riro mai outou ei puna puai no te faaite i te parau mau faufaa ia vetahi ê o te hiaai rahi nei i te reira.

E tavini maitai atu â tatou i to tatou Metua i te Ao ra na roto i te faaûruraa parau-ti'a ia vetahi ê e te taviniraa ia ratou.⁵ Te hi'oraa rahi roa'e tei ora i te fenua nei, o to tatou ia Faaora, o Iesu Mesia. Ua î ta'na tau taviniraa i te tahuti nei i te haapiiraa, te taviniraa e te here ia vetahi ê. Ua parahi Oia i piha'ihio i te feia o tei haavâhia e mea ti'a ore Oia ia parahi i piha'ihio. Ua here Oia ia ratou tata'itahi. Ua ite Oia i to ratou mau hinaaro e ua haapii atu ia ratou i Ta'na evanelia. Te ani nei Oia ia tatou ia pee i To'na hi'oraa maitai roa.

Ua ite au e, Ta'na evanelia, o te e'a ia no te hau e te oaoa i roto i teie nei oraraa. Ia haamana'o tatou i te rave i te mea Ta'na i rave, na roto i te faaite-
raa i to tatou here, te ti'aturi e te ite no te parau mau ia vetahi ê o tei ore â i farii i te maramarama anaana o te evanelia. I te i'oa o Iesu Mesia, amene. ■

TE MAU NOTA

1. Ioane 13:15.
2. Mose 1:39.
3. Hi'o Ioane 13:15.
4. Hi'o, ei hi'oraa, Luka 22:39-46 ; Ioane 8:3-11 ; Philipi 4:13 ; Iakobo 5:15-16 ; 1 Ioane 1:7 ; 2 Nephi 1:15 ; 2 ; 25:17-30 ; 31 ; Iakoba 4 ; Alama 7 ; 42 ; 3 Nephi 11-30 ; Moroni 10:32-33 ; Te Parau Haapiiraa e te mau Parau Fafau 18:10-16 ; 19:13-19 ; 29:3 ; 88:1-13 ; 138:2-4 ; Mose 5:6-12.
5. Hi'o Mataio 22:35-40 ; Mosia 2:17.



Na Elder Robert D. Hales

No te Pûpû no te Tino Ahuru ma Piti Aposetolo

« Ua hinaaro outou ia'u ra, e haapa'o i ta'u parau »

Te faa'ohiparaa i to tatou ti'amâraa no te haapa'o, te auraa ra, e ma'iti tatou ia « haapa'o noa'tu te tupu »

Te mau taea'e e te mau tuahine, i roto i te mau haapiiraa atoa no ni'a i te oraraa o te Faaora, aita e mea papû a'e e te mana rahi a'e i te haapiiraa no te haapa'o.

Te hi'oraa o te Faaora

I roto i te Apooraa i te Ra'i ra, ua orure hau Lucifero i mua i te faa-nahoraa a te Metua i te Ao ra. Ratou o tei pee ia Lucifero, ua faaea to ratou haereraa mure ore i mua i reira—A hi'o maitai o vai ta outou e pee ra !

Ei reira, ua faa'ite Iesu i Ta'na faa-otiraa ia haapa'o, ma te parau e, « e te Metua, ia haapa'ohia to oe hinaaro, e no oe te hanahana e a muri noa'tu ».¹ I roto i Ta'na tau taviniraa, « ua roohia Oia i te faahemaraa aita râ oia i haapa'o i taua mau mea ra ».² Oia mau, « i [haapii] oia i te auraro i to'na ra mau pohe ».³

No te mea ho'i e, ua haapa'o to tatou Faaora, ua tara ê Oia i ta tatou mau hara, ma te faati'a ia tatou ia ti'afaahou mai e te faaineineraa i te rave'a no tatou no te ho'i atu i to tatou

Metua i te Ao ra o tei ite ho'i e, e hape tatou a haapii ai tatou i te haapa'o i roto i te oraraa tahuti nei. Ia haapa'o tatou, e farii tatou i Ta'na tusia, no te mea te ti'aturi nei [tatou] e, na roto i te Taraehara a Iesu Mesia e ti'a ai i te taata atoa ia faaorahia, na roto i te haapa'oraa i te mau ture, te mau oro'a, e te mau faauerua i horo'ahia i roto i te Evanelia ».⁴

Ua haapii Iesu ia tatou ia haapa'o na roto i te reo ohie, e ia ohie ia maramarama : « Ua hinaaro outou ia'u ra, e haapa'o i ta'u parau ».⁵ e « a haere mai ai a pee mai ai ia'u »⁶

Ia bapetizo-ana'e-hia tatou, e « rave [tatou] i te i'oa o te Mesia » e « fafau [tatou] i te faufaa i te Atua, oia ho'i ia haapa'o maitai [tatou] e tae noa'tu i te hopea o to [tatou] ora nei ».⁷ I te mau sabati atoa, te faaapi nei tatou i te fafau no te bapetizoraa na roto i te raveraa i te oro'a e te faa'iteraa e, ua hinaaro tatou ia haapa'o i te mau faauerua. E imi tatou i te faaoreraa hapa no te mau mana'o, te mea i te aau e aore ra te mau ohipa e ere i te